

胡文忠公遺集

胡文忠公遺集卷五十七

書

善化鄭敦謹

編輯

湘鄉曾國荃

陳辦榔匪情形啟四則

咸豐三年

此間自初五日三次開仗斬殺四十二人以後四鄉

脅從漸次解散

所獲者僅止劉大天王一人尙惟首是勒交之犯非陣斬所得也

惡未得擬明日下鄉偵緝圍剿未知能否得手先是

初四初五文書之差運糧之役均被該匪等

王四老洸等

中途遣人要截網殺

大約十名以內并有支解之人兼有祭礮之說此均是

未開仗以前之事刻下官與民相隔城與鄉又相隔

差役被戕之後官衙中無一人敢於下鄉城鄉舉貢  
生員雖無用之才然不能不就地節取庶上下之氣  
可通而官民之情乃協若卑府等以橫厲無前之概  
作吐棄一切之狀若輩惟有脫身而去緘口不言耳  
該匪之罪大惡極夫復何言然赦脅擒渠乃古今不  
易之法即使渠不可擒而脅仍兼赦若逼之使爲一  
心後患將不可言前得九月朔日書知已剴切示諭  
堅索只得一紙令何教官懸於巖坑矣卑府昨擬一  
示雖不敢必其取信然匪黨勾結已遍六里不能不  
如此設想以冀早爲解散已交何教官雇人分送卽

有疑其寬緩者

卑府

亦當毅然行之初一日以後有

無賜書敬乞查明恐被中途要截平越營兵原不望  
其能戰惟冀壯威耳昨已函致該營如遇大憲親臨  
可隨同護衛前進吳甄丈曾言此後帶兵凡省城之  
人驕怯尤甚幸勿調遣或者有味乎其言之也

十三日肅稟後探得距城十里許之白巖有匪徒數  
名負險拒守壘石爲關安設大礮等情

卑府

於四更

造飯五更起程同徐令前往卯刻到白巖坡下查驗  
所設石關屬實其山頂均有草棚數處哨望者約數  
十人見官兵直上旋即竄逃當即將壘石扒一垛口

而進匪徒直奔山梁經徐令帶領練勇追斬五名生

擒五名奪獲鳥鎗二門大木礮一門約三標桿三件

餘匪滾巖翻山而逃卑府因微雨路滑飭令不必窮

追收隊回城查所造青桐木礮約三四百觔一門其粗大

笨重不知者以爲可駭殊不知鎗礮不可有絲毫走

氣之處走氣則礮力橫出矣該匪且圖重大多貯子

礮以兩片合戍則知其無能爲矣再查此事如河魚

餒敗自內而外遍體糜爛逐一焚剿亦不爲過但剿

則首要與脅從不分焚則人不可得而徒毀其生聚

恐後患無已卑府願受遲鈍之誚不圖苟且之謀一

縣之地妥實辦理不過一月可畢當其時無奇功竟  
其事無後禍本心如此未知福分才具能副所願否  
今日投誠者三寨二寨給示一寨勒交首要限十日  
後再爲給示逐一清釐苦心分明較之逐一勦洗似  
爲得計客俟次第辦理再爲縷陳平越兵已到百名  
此不過爲城中驚慌特甚耳未必有濟於事刻下情  
形四鄉附者十散六七矣

近三日之中投誠者百餘寨

今夜又得三十餘寨聞明日更多

當時

給予免牌牌卽按寨按戶詳註并備存一冊牌予民  
爲民之護符冊存官爲保甲張本也其寨中著名土

匪分別勒限緹獻以地方之人挈地方之匪不派一  
差下鄉并勒令呈繳鎗礮刻下城中設局每里派二  
人專司其事到局者無一文之費六里其派紳士十  
二人并派何教官魯未入總司其事凡投誠之村寨  
戶口逐一登明即可接辦保甲清查糧冊以杜書吏  
欺朦兼可物色醕謹老誠之人選派辦事蓋榔匪假  
榔以欺官殺人此次由官經理則六轡在手操縱因  
心昔日之榔匪爲政異日之保甲官爲政似可弭患  
一時兼可弭患永久矣十日之內大致可定一月之  
內當可就理勒緝首要一節差不可用練不可用只

有用地方人民之一法縱有違颺之人亦必有就獲  
之人就獲者解行轅辦理違颺者責成地方則永無  
歸路至則成擒惟在行之以實持之以恆耳卑府之  
愚總以安民爲心以不嗜殺爲主恐事機稍失貽害  
無窮察看情形解散者十居其九均是實情初五十四軍  
威未挫匪技已窮兼聞麾節按臨故不煩言而解兵  
可不用餉可有餘

鈞帖敬承至訓十九日從早至暮投誠者二百餘起  
人人親爲點均給免勦牌內有三四紙叩畱未發仍  
名問之教之限十日勒交補給又白巖之李武生綽號六霸王到



案勒令另緝巨魁贖罪又巖坑角旁等處投誠之中頗有匪類已加結加保加限前往緝匪并搜尋大鐵礮大木礮等件以爲贖罪地步密察情形似非不力二三日後當必有確信矣保甲乃救此禍之急藥投誠畢而保甲之綱目盡得矣每寨若干戶現在投誠者幾戶未來者幾戶已逐一註明其已到之戶名已詳悉粘單存投誠結中渤海不云乎亂國如治亂繩又云將勝之乎抑安之耶誠爲此時此地寫照

論辦甕安榔匪啟

三年

卑府

八月三十日帶黎練二百五十名鎮練七十名馳抵甕安其地土匪蜂起幾於合邑皆是而千里之

干溪尤爲倡亂之始初一日出城至千里擇野田中  
安設營帳傳集城鄉士子設法開導赦宥脅從專緝  
首要實已舌敝唇焦至再至四詎該匪劉瞎么等於  
初五日三面撲營數至二三萬人木礮鳥鎗直前抗  
拒並將持牌開導之差役細殺祭礮牌示砍毀往來  
文報米糧一並阻截劫奪民夫官役細殺至十餘名  
之多且於官軍來路折橋斷後其心叵測不得已親  
自督練斬獲六十餘人賊燄稍挫被脅良民亦解散  
十四日復探得賊匪於白巖險要隘口壘石爲關安  
設大礮當於夜半造飯冒雨潛行出其不意攻破石

壘奪獲四百觔大礮並鳥鎗刀矛數十件賊匪驚覺  
追斬數十人並生擒首惡劉瞎么卓老五等餘匪並  
被脅良民十散其九現在按名勒緝逸犯準令被脅  
各戶投誠免罪並予緦獻匪徒贖罪於城中設局收  
結過堂造冊記載戶口多寡分別有無遺漏以爲辦  
理保甲團練張本初劉瞎么等十餘人於上年四月  
倡議以齊榔爲名斂錢建廟忍民之不從也則以厯  
年來詞訟告官不理盜賊控官不究不如在鄉私埋  
沈河由榔斷案罰處省費不準入城爲詞又恐民之  
不輸錢也則以榔成後一切錢糧由榔作主可以欺

官減糧爲詞實則甕安官糧所餘甚廉並非朘民以肥官然而愚民之信而從者十之一畏而從者十之一遂於六里中各村各寨選取素不安分武斷鄉曲之人派充頭目大者管領數千百戶小者管領百數十戶勢稍稍滋蔓矣本年派錢建廟已成復按戶派遣烏鎗按戶共造大礮民之不願入夥者掠其財產毀其房屋控案纍纍派差拘拏細殺多命民之畏之信之附和之者十之八九此甕安始亂之實在情形也幸而發覺尙早代庖之令徐河清未敢諱疾故黨羽不堅器械不習官吏猶得而懲之耳或謂匪人以

齊榔滋事亦藉保甲爲名顯與官抗乃不多殺以立  
威而從保甲著議非襲其成跡歟對曰昔日之榔匪  
爲政故亂異日之保甲官爲政且可選擇人之有才  
品身家者充鄉正甲長之選故可治也綱目初舉條  
緒尙煩一月二月後實力辦理當有轉機渤海不云  
乎赤子弄兵潢池將勝之耶抑安之耶升卿錯節利  
器爲先此一說也治亂繩又一說也揣勢  
度時不可膠一法以求治愚昧之忱未 識有當否

致左季高

三年正月初二日

季高先生姻丈執事年前專二力奉上一函又郵寄

一函計先後可到崔正甫除夕過濰詢問賊情言楚  
北大勝武昌危而復安然乎否乎張石卿先生公誠  
英勇極力振飭楚中數十年積弊當可復見天日但  
辦事總以積漸而成若得二三年內不卽升調則勛  
業必集閭中丞勤勞特甚亦須節省精力又聞先生  
終日勞神案牘竟無片刻之暇竊謂宜再延一精曉  
例案之刑名幕友專管咨題文案而先生專管例外  
之奏摺及例案外之文批則精力有餘智慧更大謀  
畫更鎮定而有餘刑名法律秦漢已然卽蕭曹名將  
相亦以文無害見長絳侯將百萬兵而不能爲獄吏

牘背自古如此何況今日大抵天下亂則法密密則必亂天下治則法疏疏則必治此不刊之至論而無如胥吏之天下勢不可驟挽回也惟在司事者神明於規矩之中耳目今辦事必須知今知古知今者可與言蕭曹之規隨知古者可與言房杜之謀斷先生可謀可斷而法律太繁則恐精力或有不及 大清律易遵而例難盡悉刑律易悉而吏部處分例難盡悉此不過專爲書吏生財耳於實政無絲毫之益然疆吏殫竭血誠以辦地方之事而部吏得以持其短長豈不令英雄氣短乎林翼所處只有一府耳其辦

事也終日不停披口不絕音然精神志趣專注於  
紙片之外其必須形之公牘者詳司達部付之幕友  
一人之精力幾何若於文牘過勞則精神已疲於小  
事瑣事轉不能辦其遠者大者矣敬質高明以爲何  
如楚北情形究屬如何并乞明示林翼捕盜一月有  
餘各屬報獲已逾百人而逋者尙多擬再親往督緝  
總局審局仍設於灕中黎平二年捐搢然用力良苦  
其地士民醕謹不刁不詐不淫矣實爲黔中諸郡之  
冠但嫌稍弱耳一年以來訓練武事頗改舊習到黔  
七年四握郡符黎平頗盡力安順久之鎮遠只四月



斯下矣思南八月最逸又最有餘無甚新政德慧術

知視其操心如何耳黎平本楚地 國朝改入黔版

何忠誠公

明諡文烈  
封中湘王

故塋從湘潭改葬來黔至今樵

牧不禁無人看守林翼捐貲修理復置田產惜才力

薄劣不能歌詠其美耳前此寄函以用人練兵四字

奉質高明用人在旌別淑慝樹之風聲不必多爲參

劾而風氣自可轉移練兵則必須挑選定額本多只

須簡取十分之二練成勁旅則有事時可以制勝無

事時可以震攝奸萌林翼之學力至薄才力至小固

知無補於盛業然不能已於言者其心誠耳老母年

高時患痰嗽得到漁侍奉數月甚覺安貼唐宅周宅  
姻事今年必欲辦了一妹戊戌生年十六一妹遺腹  
生辛丑六月年十三尙未字人曾託便中物色佳子  
弟乞畱意爲幸

與孔廉訪論會匪啟

三年

承索所論會匪情形書謹錄以聞此辛亥年秋杪事  
與今不同今日國威不振卽愚民亦生狎侮之心  
何況莠民當以練兵求才爲先務如飢渴之於飲食  
一日不食則飢一日不講武則死所望有兵事兵柄  
者屏棄萬緣專意武事黔中之事非立誅三五貪劣

將弁并劾去三二十人則不能起鼓聲而作士氣以九十萬之餉養此昏庸之鬼每兵百名侵蝕空曠殆將及半其半在伍者皆城中稿房隊目之姻婭僕妾之黨耳否則革兵老兵死兵之子孫耳否則將弁僕妾侍婦之子若孫及壻及姻親耳胎病已深來頭已久油滑怯懦卽日夜講武未必能武況得過且過耶所望有兵柄者日夜懸一死字於臥榻之旁知此身之必死則於此求生或有生機更以武昌安慶金陵之事作一設身之想思之鬼神通之兵事尙有辦法矣嗟乎此言亦僅可於知已前一吐其愚耳

啟孔廉訪

敬稟者舊州一帶之事早已定局因太平堡一隅僻處尙有觀望之人於初六日領練成行二日至甕安縣之侯場而黃平民悔罪輸誠到案投結者紛紛而至此等事當其氣發方張之時非威不濟及其恐懼消阻也可以恩行然所謂恩者亦不過持重養威准其自新限以勒獻非消化而示以姑息也緣匪徒務糧戶以爲聚眾之謀不解散糧戶則不能伐其謀若意在急切則良懦受害加以攻伐則首從莫分卑府之愚必先分良莠如醫治疾扶正氣即可禦外邪也

黃平之事不日可完至襄安涓潭屠齒相依狼狽爲  
奸甕安匪徒尤甚殺官馬奪官械徐令專以恩意諭  
人然不可久無可守之城無可戰之士無可傳喚之  
差初到無人告狀近則有人來城亦稟告榔匪私行  
擅殺而已若得大憲恩示多張貼於四境示諭之意  
專指匪徒之聚眾以鬧糧爲名而私罰人錢擅沈人  
於河一切不服官斷必應將首要網獻許免脅從如  
再抗違准某等帶兵練勦辦以此虛聲默爲開導則  
保全必多總之匪徒非由糧而始起事特不藉糧爲  
名不能得人不能得財卑府等亦非欲爭糧利而來

安糧戶卽所以散黨羽匪徒之勢孤則緝拏必可得  
力否則卽減損糧戶至於無糧而地方之害彌大區  
區之愚直陳無隱

啟陳剿盜十三條

三年

道光二十九年十二月晦日率師討苗匪用兵千七  
百人營於險要令其毋擅動毋挑戰用革夷附近之  
團練萬七千人環而集之搗其巢穴復以計誘之賴  
同事文武士民之力得盜頗多

卑府

於二月十七日

又往黎平堵楚匪矣三十年十月逸盜二十餘人殺  
寨頭阿賈以逞阿賈者卽是年春助官縛盜之革夷

寨苗也頗知大義識漢文於是鎮遠黃平台拱清江  
清平丹江凱里施秉各官吏再會於巖門跡成事以  
圖續勦自三十年十月至於元年三月乃歲事而盜  
固逃竄於荒山密箐中正犯無一獲也然則契舟可  
求劍乎膠柱可鼓瑟乎必當知所變計矣近日台拱  
清江丹江施秉之盜又稍縱矣約而言之昔年之事  
利用圍攻今日之事利用追勦昔年之事賊可餌誘  
今日之事當以力擒昌黎韓子慷慨有大志陳說十  
四條至爲精當謹另錄以呈復思其節目之未備者  
附呈十三條惟密採而留意焉

一辨盜先須寬吏議也王夫之言自古盜賊之多無  
若東漢光武先後所降幾至二十萬其通鑑論宋論  
津津其言之考漢史建武十六年郡國羣盜處處並  
起郡縣追討到則解散去復屯聚乃詔遣使者下郡  
國聽羣盜自相糾擿五人共斬一人者除其罪吏雖  
逗留迴避聽以擒討爲效但取獲賊多少爲殿最惟  
蔽匿者乃罪之夫上之用意嚴而用法密則下之避  
罪巧而貽害乃愈深倘能捐棄一切特參之條寬以  
時日責其擒討在下者感寬大之恩惠而不必用其  
欺在上者有切實之事功而不煩虞其詐如此而後



事無窒礙督捕之員亦不致貽同官之罪戾否則上下相蒙終歸諱飾而已矣

一捕盜莫善於雕勦也黔盜裹巾扛礮情罪與逆匪無異以不選不練之兵練勦之則盜必拒兵必潰以精兵精練勦之則盜必竄矣然則當從竄處著議矣田山薑黔書厯陳平苗之往事以分而勝以合而敗不惟深明兵法亦且洞悉苗情竊計用兵練五百飭委幹員將黎平之精練挑去百名於都勻鎮遠兩府標式招募二百名必於其地招募者卽慶鄭所謂生其水土服習其道也於營兵標式招募百名或二百

名古州鎮遠貴陽各鎮協營中每處十人或三五人或竟無人可缺而不可濫其兼用營兵者營兵固怯然百人之怯豈無一人之勇虞允文收集潰卒致功於采石勝國逃潰之兵入本朝而爲龍興勁旅卽此意也且事後不煩安插卽不虞後患

一標式以選精銳不可專用火器也宜長短相閒長兵者鎗礮弓箭是也短兵者刀矛鑱棍是也叔世人心怯懦偏重火器謂可殺賊於百步內外無跳盪搏擊之危非特賊刃難加我身并賊血亦不得汚我衣何便如之且隱計於百步內外開礮若見勢頭不好

丟棄鎗礮逃去賊追不及又何便如之兵因火器強  
亦因火器弱誠然誠然明季偏重火器而兵益弱議  
者欲改其制而莊烈不允遂亡於流賊自喫夷入犯  
中國見其以火器勝我亦遂因而偏重之每營刀矛  
手少火器手多刀矛手自大操三跳之外未有練習  
者所練習不過火器而已然十餘日或數月始一操  
一操只打三鎗命中者十不得一是有偏重之名究  
無偏重之寔也以此毫無可恃之技臨陣未見賊氣  
已餒矣旣開仗心益惶手益戰矣於是或裝藥忘卻  
下子或先下子而後裝藥或裝藥下子而忘卻發藥

或開放於百步外一二鎗不中則相與棄鎗反走又何怪每仗必敗乎昔冉子用矛入齊師孔子稱其義爲其奮勇直前舍生以合事宜也烏枝鳴用劍敗華氏謂用少莫如齊致死齊致死莫如去備此二事乃兵家之秘後世得其秘者岳忠武之背鬼軍五百人本朝岳威信之馬兵三十六人楊昭武長鎗手百人皆是也邇來軍威不振極矣總以火器不可當爲詞司兵柄者亟宜變計矣大約火器手宜四成三成刀矛手宜六成七成每日操練以備戰鬪火器當前刀矛繼之火器精可壯刀矛之先聲刀矛精則火器有

恃無恐精火器之人尤須並精刀矛則膽氣愈雄神氣愈定而打放不空果能打放不空勝已七八矣况又以精悍刀矛衝出如雨驟至賊焉得不奔潰哉故今日標式以火器四三成刀矛六七成爲要

一用兵貴審形勢也委員選兵募練於二府之地兼可畱意地輿度其險要鄧侯以圖志而知阨塞之要亞夫因趙涉而搜殽黽之盜自古將帥類然此行兵之至要也

一多用委員不如兼用士民也肉食者鄙未能遠謀曹劌鄉氓功成長勺此用士用民之說也用都游以

上不如用千總以下智勇困於所溺仕宦怠於已成此都游以上之說也能與士卒比飲食可得士卒之死力能耐飢渴奔走然後能與盜相追逐此千總以下之說也鷹之在韝也飢則爲人用飽則不爲人用夫中人之性亦若是焉已矣惟士民武弁功勞不可淹沒不得以與例不合而舍是昔王文成之征南贛征粵西所用皆門下學究書生功績甚偉然死必有卹功必有賞是可法也

一雕勦宜實行保甲團練也韓子可主征討之任然任於此不能分於彼保甲團練不精不嚴不切實認

真如一身一家之事則征討之事亦窮投戈而混入寨中則如人入羊羣見羊而不見人畏我而匿於荒谷幽箐則如以驥捕鼠於井竈之際反不若跛貓矣濫殺之不可稍縱之卽逝故必精保甲團練然後可以收雕剿之功

一保甲團練須用士用民也近年保甲團練人人言之亦人人行之然文告徒煩實政無補脾籍空設良莠不分其交給土司差役分發各鄉者徒資訛索尤爲浮僞夫十室之邑必有忠信三人同行厥爲我師一邑之中豈無二三明白正派之紳士虛心訪之實

心求之委令下鄉帶同冊籍每到一村先於此村訪  
彼村之正人才人有衣食有頂戴人到村又訪前村  
後村之人廉得其實加以委任官爲給札註名於冊  
責以保固鄉里之義諭以分別良莠之機付以防捕  
救援之法隆之以禮尤必須董之以威雖欲不屑其  
任不可得矣彼鄉正團長到城繳簿一冊存官一冊存鄉預囑  
家人門丁隨時傳入不得稽延其冊中良莠密加訪  
察密爲記載不可卽爲施行其所請防捕救援事宜  
分別可不立卽施行不使羈候於城中其怯懦退誘  
者卽時斥責其迂闊不曉事者反復開導委曲求全



其公正明白者侍坐賜茶食卽椎髻之苗草屨之民  
侍立於側切實講求苟有知大義者卽不必苛以尋  
常官禮其下鄉委員紳士所帶書差官爲給貲擾及  
分文者杖之不赦如此而後保甲團練之事十得三  
四然猶不敢謂其已成也而奈何易言之也

一保甲團練須官爲士民作主也賈子言治天下至  
纖至悉其保團之謂矣監司以上大憲可示其教而  
勢不能理其事理其事者其牧令乎然而才具各有  
所宜不必盡能其事亦不必實行其事無已其擇州  
縣樸實精明講求此道者由大憲札委或專司其事

或隨知府督辦予以貲財寬以歲月務求訪察至精  
奉行至實或有濟乎然擇官專辦或係在省候補而  
久勞於外或本有實缺而奪其所有均非俗情所能  
堪亦恐室人之交謫凡委員之督戰與辦保團者月  
給私費百金便爲至厚酌半亦可計委員不過數人  
委任不過一年恤其內顧之憂而彼乃不能紓大憲  
之憂忍乎敢乎

一保團縛送之賊非速審速賞不可也賊到而不立  
審則鄉民如重負在身方以送盜爲厲已矣粗審而  
不細切則必不肖速賞賞遲而民氣怠矣不計功不

謀利非可責之蚩蚩之民使其送賊而在城守候至  
於一日二日之久其愁怨當何如耶何以勸後故貴  
速審貴速賞

一審盜貴專精也委員捕獲之盜及鄉民緝送之盜  
到案卽詳訊其案情多寡行止聚散一飲一食至微  
至陋之處並其同夥行蹤年貌逐一筆之於書隔一  
日再審三五日又審其不留意處其細縷處一一符  
合則盜真矣凡盜供之狡賴者無同夥之眾供以指  
其瑕且官亦無隙以發其私故善訊者不恃刑求凡  
被誣而妄認者

人汝誘許以錢物彼竟不知錢忱之不可得

以亂刑加以恐喝

凡猾胥教供冒實往往以此兵丁亦然

竟有自認不

諱隨口妄攀他人詳悉筆之於書異日再訊卽其直  
認處必有自相矛盾之隱可得聞矣此事惟黔苗受  
害最多其愚過人也故審案貴精在外委員將犯供  
逐一稟之臬憲尤須委能幹樸實之員於臬署設局  
最爲要著辰入酉出交供呈核譬如風簷局試白卷者少  
否則酬應徵逐日復一日抑且年復一年案以久而  
不了犯以狡而愈疑故審案貴專

一提解斬殺可便宜也凡盜就獲除委員格傷格殺  
外令其逐一詳訊開列同夥年貌案犯日期無論遠

年近年已報未報多獲少獲概不爲罪以申文露申而實供則密稟臬憲即將正犯就近交地方官押解從某處至省城止均係沿途文員親自派押遞交臬憲復訊後請令正法續獲再正法彙至事竣始入奏則法網既無窒礙限期亦屬從容可以實盡心力矣一經費宜寬籌也精兵精練五百人約每人日食一錢月須一千五百兩加以委員紳士薪水與夫價差盤礮藥鍋帳夫役又加偵探眼錢此最要費不可惜大約用閒謀差探總須五十月費總在三四千金一年肅清則四五萬人或百人兩可以足用惟須由大憲簡派二人專司其事期於

核實不欺而已

一委任宜專也委員如韓子者腹有詩書豈至以聲色加人私欲求人然以卑官辦他境之事非克伐怨欲不行之地方官不能同心協力越境攻盜之難曩固疑之今日驗矣然使大憲深信無猜則事必有濟近日人心怯餒中無所有即使謠啄播於都會蜚語傳於京師而明鏡在空流言自止毅然付余玠以汴師委陶魯以岢賊權之所屬威望重焉不待斬莊賈戮揚干然後令行禁止也虎帥以聽誰能犯子而東里因得志於鄭國非明徵歟

以上各條數之無甚高論愚陋之識知無不言大抵常人之情當厝火未然則諱言兵及赤眉黃巾安史闖獻起則曰此乃天數非人力所能挽回然亦思樊崇張角等果天殛之乎抑人誅之乎究是幾個有志之人將狂氛埽盡耳而謀國者又動以無財爲說竊念鄭畋守鳳隴韋臯鎮川蜀皆值國步艱難物力不足之時而勁敵當前屢索餉賦何不聞以匱乏撓大計又况明季國窮守都城兵至於米薪不繼乃本朝定鼎之初天下入版圖輸租稅者僅三分之二何以用兵數十年不致告匱

不聞往遼東飛芻挽粟不聞議推廣秀才舉人之  
例此無他天下之財本無不足視其政事何如耳  
如蒙採擇天下幸甚黔中幸甚

附韓州判勦盜匪說

經書何儒不讀用以爲文好醜各殊者切題與不  
切題也古方何醫不記用以療疾生死不同者切  
症與不切症也兵法何將不知用以臨敵勝負各  
岐者切時勢與不切時勢也方今會匪鴟張土寇  
蜂起粵楚抗捏不安而黔地惡苗遂亦欲因風縱  
火非速加懲創禍固不可勝言非妥爲安排亂又



烏知所底是在卽賊與我之時勢熟籌而審處焉  
耳苗耐飢渴勞苦寒暑無所畏避行止輕便無行  
李背負飯包大可供數日食上下峻坂捷若猿猱  
又習用火器從禽逐獸日以爲常曲左臂架鎗其  
發多中此其所長也性多疑忌貪利無陣法疑則  
易誤以多方忌則易誑以鬼神巫師貪則易釣以  
餌烏合而無陣法則易制以節制之師此其所短  
也至我員弁兵練膽薄技疏不諳戰陣遇敵則退  
後論功則爭先有短而無長方諸乾隆嘉慶間已  
遠不相及何論 國初然則當此之時處此之勢

將剿苗匪其何道之從乎謹卽管見臚陳十四條  
敬陳左右

一明賞罰有功而不賞有罪而不罰固非有功而  
使無功者受其賞有罪而使無罪者受其罰尤非  
甚至有功而反受罰有罪而反受賞是非顛倒更  
不足以服人心惟賞罰當乎功罪則賞一人而三  
軍勸罰一人而三軍畏乃知所趨避焉耳

一謹約信鼓之而弗前金之而莫退呼之而不至  
限之而故違雖韓白孫吳不能操算矣夫收信之  
效在臨事而致信之效在平時平時不輕下令有

令則不更不苟相期有期則必踐古人千金徙木  
三日去原約信不爽毫釐三軍所以用命也

一勤操練近今弁兵怯懦見賊卽逃雖有不逃亦  
未聞直前殺賊此固由志卑氣弱亦自顧無保身  
殺敵之能不得不苟且圖免耳則操練安可不勤  
乎然尤貴因地制宜也昔秦再雄鐵甲度水傳重  
庵提重登山皆度地練兵所向無敵今將勦匪於  
黔省多山之地我兵技藝行陣必切多山之地爲  
之方有實用犂确之徑難登故身宜輕也巒巘之  
間多礙故陣宜疏也如此則將勇兵強戰勝攻取

矣

一簡趨捷苗跋山如履平地漢人弗若也一旦相角逐則彼急我遲彼暇我忙優絀分而雄雌判矣此宜用沙囊之法練習升高陟遠簡其趨捷者別爲一軍或用以邀擊或用以跟追或用以繞道別出此勦苗匪之必不可少者

一選員弁一將豈能獨理則協理之文員武弁在所必需雖然軟熟者不可用諂諛者不可用胸無實際大言欺人者更不可用選其反乎此者則庶乎其近焉已

一擇士民官來自遠於苗境之山川風土未克周知豈若士民之生於斯長於此哉此宜擇其有才能而心地可靠者不分漢夷使之効力軍前以供指臂之用

一嚴保團保甲團練最爲守禦之規近年大憲已三令五申特患奉行不力耳嚴以督之未行者咸能遵依已行者益加振作村村自守不獨難於裹脅從賊者稀抑且困於糗糧呼庚者眾況能各出鄉兵隨處截殺其有裨於勦匪更爲何如哉

一精閒諜善用兵者凡敵境之險夷敵眾之多寡

敵意之趨避敵黨之離合敵將之性情嗜好莫不  
灼知故能批卻導歟應手而解然而甚難其人也  
必其沈密勇敢又有妻孥之繫然後予以厚貲俾  
混入賊中以察悉其纖微若能不用漢而用苗不  
用民而用賊則言語相通氣類相投更爲得力耳  
一務分攻苗性遲疑不決我分兵以亂其耳目則  
方寸益淆苗性專一不歧我分兵以致其紛紜則  
氣力必懈至於力不能支或且潰圍四處集散亡  
以再肆狂氛又當空闕一方層層密伏使之聚而  
殲旃也

一防伏劫自來苗匪跳梁其兵法有二埋伏與黃  
夜斫營而已我軍行走宜翼以搜伏之軍戰勝追  
逐宜用威南塘埋伏之法至每夜伏路與瞭望者  
尤宜加意

一勿妄殺爲賊者誅餘人不問若波及無辜甚或  
欲絕其種類則奸人得以煽動必至蔓延

一勿輕撫人心思亂已久加以邇來粵楚不靖更  
思効尤其真正爲賊者未至十分窮蹙而遽撫之  
以博好生之名且或以爲易了之計則禍心未死  
轉瞬復張此宜痛勦靡遺方足杜萌芽而昭鑒戒

一急捕亡剽辦得手之餘其著名惡匪必有漏網  
逃匿者倘以黨與既散了然無復可虞竊恐不數  
月間又將招集其徒再圖舉事此宜迅速搜窮罪  
人期得而後不慮其復然也

一緩撤兵兵事費用浩繁早撤一日則省儉一日  
所以一得勝仗便思抽撤賊勢將次平靖便思全  
撤後來之熄而復熾軍需益不貲未之計也試思  
一簣未成乃不甯及時竣工致令全山頽圯再思  
平地爲之果孰逸孰勞孰省孰費乎此其宜於緩  
撤也審矣



此十四條自嚴保團以上從已作事自精閑謀以  
下從彼著想皆切時勢以籌之者也而操練閒課  
二條尤爲緊要誠能不中沮於事機不旁撓於羣  
議精心果力徹始徹終於勦辦苗匪何有哉

胡文忠公遺集卷五十八

書牘六

善化鄭敦謹

編輯

湘鄉曾國荃

論東路事宜啟

咸豐三年

下游情形殆哉岌岌姑卽愚陋之所及知者而言之  
已不下十數事麻陽船戶辰沅水手皆强悍有力鎮  
遠以上驛路腳夫亦游蕩不羈兩三月來客商裹足  
不前無所得食人心皇皇殆不可支夫以官養民不  
如使民自養爲盜而死忍饑而死等死耳犯法可以  
賒死忍饑則將立斃可慮一也各府各廳之寨苗大

者一二百家小者三五十家連年盜劫積蓄一空爲  
良則畏盜而又畏官畏差爲盜則一無所畏是將迫  
之使爲盜可慮二也良苗終日採芒爲食卽登彼西山言采其  
芒之四時不能得一粟入口耕種所入遇青黃不接  
之際借穀一石一月之內還至二石三石不等名爲  
斷頭穀借錢借米亦然甚至一酒一肉積至多時變  
抵田產數十百金者心怨之而口不敢言其黠者則  
怨恨所積引羣盜以仇之耳而漢奸終不自悟方且  
失之於盜劫而取償於盤剝可慮三也苗產盡入漢  
奸而差徭採買仍出於原戶當秋冬催比之際有自

掘祖墳銀飾者矣蒿目痛心莫此爲甚各廳并無錢糧贏餘專恃差徭採買一切陋規以爲公私之用近年民力日絀官事日多卽令如數收納尙呼瘠苦何能禁止而強以不情且力役粟米之征一概停止則苗民脫身化外不復知有上下之分是禁之固難將縱之而任其多取乎則窮愁怨歎苗民日見其蹙將更法而歸於受田之漢民乎則差徭採買有已成之俗例而非賦役之正供苗寨本無錢糧漢民豈肯領受訐告紛紛上下其手可慮四也官取於苗者十之三土司通事差役之取於苗者十之七取良民之精

血以供其宴安酖毒之資台拱丹江古州八寨清平  
其弊尤深可慮五也漢奸恐喝苗民無所不至卽如

上年十月倡言某人帶兵見黑便殺

苗民青衣故雖云見黑便殺

大張曉諭開布公誠而浮言不止其造言恐喝之人  
卽平日盤剝之人卽異日倡亂之人欲藉以快其私  
耳人心思亂無理可喻可慮六也官兵數萬已成廢  
器卽令千人爲營而十賊可破凡有血氣莫不痛心  
屯軍九千餘名布置各堡本極周密然虛籍徒存實  
政無補數十年之積弊不能一旦挽回今日之食屯  
田者半是刁生劣監一旦繩之以法則捏造黑白勾

煽愚苗其禍且益速操之太急是鼉錯峭直之弊委  
心任運是胡廣中庸之謂可慮七也邪教之興隨地  
皆是根柢既深萌芽已露惟大臣持正而不阿小臣  
奉公而潔已則無隙可乘尙可不卽舉發黔中近年  
大憲兢兢業業察吏頗嚴然在上有震動恪恭之心  
在下有得過且過之意未經患難不知恐懼公牘所  
到寓目已忘可慮八也天下治亂之機不外乎義利  
二字人心嗜利則亂嗜義則治近年嗜利之人豈惟  
官哉凡在官之人皆然也卽在野之人亦駸駸乎其  
莫不然用人而不得所養雖堯禹之憂勤不能以治

天下亂則耗財多處已亂將亂之時則賞不得不重  
罰不得不輕故耗財尤多度支已竭仰屋空嗟可慮  
九也禍積於蕭牆勢處於危急而不能不資成案秉  
舊例絳侯之乞憐於牘背魏尚之見屈於刀筆吏古  
今同慨必至決裂不可收拾例案一無所施而後節  
目疏闊則事已不可爲可慮十也勤王事者食於官  
舉義旂者食於民舍糴事而割正夏湯是也孰敢不  
簞食壺漿以迎將軍諸葛之言是也南陽太守稽顙  
義師斬一守而人皆奉令孫堅是也天下非鄙吝之  
人不能聚財非抑勒不能散鄙吝之財明懷宗之勸

慰而不助軍餉季自成之腦箍而盡數以獻叔季人  
心大抵類是粵逆入鄂括取民財計逾千萬設官爲  
董勸則十萬亦難不至此時不知悔懼人心又大抵  
類此黔中官兵仰給於藩庫藩庫又仰給於鄰省轉  
運則有所不能抑勒則有所不敢畏首畏尾勢必致  
官危而民亦不安可慮十一也兼弱攻昧取亂侮亡  
言道學者疑之而英君賢相之方畧實不外此自强  
者天道之所取自弱者洪範謂之極帝王馭世之微  
權必取強桀之人預爲駕馭爲我用而不爲人用  
世廟募武力絕倫之人令史相國統領駐防豈爲駐



防哉所以消天下之英傑而不覺耳姚啟聖督浙閩  
署中歲費以百萬計不數年而海澄公施侯歸於摩  
下今欲鎮攝邊陲必須日日練兵貴東一路幅員至  
大非挑練精兵八百人分防分捕且戰且守則不足  
以攝奸萌而資防範一年之費又將安出可慮十二  
也黔餉設令不繼則兵民皆困禍不旋踵將任其自  
亂而自已乎抑將養壯士而去老弱核名實而察空  
曠乎非常之原黎民所懼行之不善是明季裁驛卒  
之事行之而善是商鞅變秦法之事成則爲怨府敗  
則爲禍階可慮十三也保甲團練實救時之善政委

員之辦事其時甚暫恐民不信其勢相隔恐民不親  
則非收令不爲功矣然而奉虛文者無實意察小害  
者忘大利大憲之董戒不啻穎禿而唇焦各屬之奉  
行惟有稟復與告示可慮十四也大江東去望風瓦  
解刺臂奸細反來黔地卽是逃匿之餘亦恐勾煽之  
禍可慮十五也以上十五事姑卽東路而言之然而  
言易行難病多葯少非一手一足之力所能挽回亦  
非空言勸說所能補救約而言之則亦不外練兵求  
才察吏籌餉四事耳已亂易治也未亂易治也而將  
亂難治林翼之愚陋卽使殫精竭力亦無補於萬一

况一人之精力幾何一人之才識又幾何如石填海如蚊負山固自知其不堪矣區區愚誠尙祈鑒察

辭委署東道啟

三年

頃接省信稱西道委湖丈東道飭委

卑府

暫護云云

道路傳言未知信否查

卑府

奉委防楚兼辦內匪粵

匪比來西竄遂專意捕盜自十一月以來各屬所獲據報已及二百五六十名除窩戶接引不計外尙恐有妄挈塞責等情必須逐一核實定罪始能分起稟報通計核實真實劫盜一百及二百名二百之中其尤兇狡不計劫殺次數者總在百名以外其行劫二

次三次者尙在小盜夥盜之數不足爲奇也

卑府以

盜匪之蹤跡所在卽移營相向本無一定住址近月以來賴地方官及各委員之力盜勢漸已衰息而尙有十數犯未獲督緝許久隱匿無蹤焦憤之餘寢食均廢近日舊恙復行舉發此

卑府

奉委承辦實在情

形也若使護任東道勢必有各處公牘核辦轉不能專意辦盜東道駐古州僅能照應附近一面衙署書差文案等件均已安土重遷拘守一隅已屬鞭長莫及分巡各府勢必搔擾官民於辦事轉覺不便古州已界粵西春夏秋三時酷熱如火烈烈瘴癘異常道

憲和平涵養靜攝猶深以瘴癘爲念

卑府

兩到榕城

時際秋冬日閒汗流浹背夜閒重衾不溫抱病而回

雖萬不能顧惜身命情同規避然身體不適必不能

努力辦公誠恐貽誤地方若使移印就地而粵西一

路遠隔十餘站緊要之地既不可無官鎮壓粵防楚

防顧此失彼關係匪輕此又

卑府

揣度地方之實在

情形也而私心所急欲陳請者則不能侍養老母實

屬烏烏之隱情大憲錫類推仁永言不匱尙乞憐而

念之

卑府

之母七十有八在安順跌傷左足雖已醫

治痊可而動履須人勢必不能跋涉道路且左目瞶

神雲翳去冬今春痰咳尤重一夜之中可吐一二碗

去年前年

卑府

在黎平再四迎養母意總以鎮遠近

居水次可以回籍爲詞

卑府

之愚思欲了辦內地盜

匪卽乞憲恩俯允回籍所以不能陳請者憲恩高厚

欲到籍後再備文牘耳

卑府

終鮮兄弟又無兒女年

來母氏老態頓增心勞力拙百病叢生犬馬之力實

已疲乏不堪並非委恩眷而甘自棄迫切愚忱不得

不直陳於大人之前去年冬杪密稟已請此後不再

署事曾蒙恩鑒左公來信云云

卑府

亦已再四堅辭

實以母氏年高賤軀多病不得不求卸肩耳遲遲未

行徒以恩眷至深知遇非常不能遽去不忍遽去思  
欲內盜漸清稍報知己之恩耳瀝誠稟求伏乞慈鑒  
俯允至委署之員上游則某某三守可以兼護下游  
則某某四守亦可兼護正不患無才臨稟不勝激切  
悚惶待命之至

致黎平府曹子祥

興仁

此閒之事忽插一波幾與全局大礙幸止之尙速然  
投誠者頗觀望矣勒緝之事連日無獲甚爲焦急弟  
本無才而此地官民毫不相通上下之情隔成兩橛  
所以難也湄潭之事隱容於前又求助於後既不能

強又不能弱此之謂也昨奉憲諭以弟請咨尙有留  
意但弟之不可留者有五與兄久處相知最深故縷  
陳之尙乞婉詞密稟自到黎平後羣盜如毛攜重資  
破宦囊以濟目前粵逆擾桂林相距六日程身處瘴  
地六月於此乃因王廉普一言而疑之并疑薇柏之  
偏信此八月所以兩次請病因留摺又出兩憲之手  
情義所感濡滯至今此遷延之計也其不可再留者  
一奉委辦盜在窮谷荒山中支帳久處馳逐半年斬  
殺實已不少烏沙革夷尙餘三四十名亦未敢欺上  
然已獲二三百名矣因廉普諸公以爲多事到省後



中峯亦不以爲事見面之時漠然寂然近年天下大亂何處不因莠民而起且兵政如此而不知整吏治如此而不知察如甕安額兵四十八名實在不過八名其四十人僅飽貪弁若甕安果有四十五之兵何至人情驚恐動輒欺官耶又如今令之貪鄙昏庸在一處卽壞一處有一言謂其釀亂否國計如此而尙謀自奉人心風俗如此而尙顧私情竊恐此方之事前盜已死後盜又生不過一年又當復熾事不可爲此其不可畱者二黃平之事始終懷疑遂至謗言四起在外之微員以二三百人抗萬餘之眾到頭

尙是擅殺耳誰敢忘身以殉事耶甕安初次之來無  
一二字提及故不敢殺一人非推諉也分在則然耳  
此次幸臬憲按臨信到之日羣小閔然卽日解散緣  
外閒訛言以知府系徐公私請而來人微權輕勢必  
相抗其不可再畱者三林翼久無利心黎平二年私  
計久紬家丁清苦尤甚散去者五六人尙有二三廉  
謹者亦將引去在黔八年除綺城小雲外又除尊處  
曾經通挪外交情絕少去秋至今所賴以借貸者灘  
中行店耳刻下已計一千八百市賣皆窮借貸亦難  
此私計之不可以言狀者集鬱集枯自有命焉弟之

不求財是本心也惟一家數十口僑寓澠中於今三年送回鄉里易於食貧此又私計之不可再畱者四省中巷談塗說忽以開缺加按察使銜訛布母氏疑爲某公所中傷而不知開缺一層弟曾辭之弟意其意不過欲爲明麟諸公計耳牛驥一皂不敢梯榮且不於某公未到之前而於某公旣到之後事可知矣虛意羈縻中心不好其不可畱者五總之八年黔中險阻備嘗握印不滿四年帶兵將及三年犬馬之力億矣然終以小人目我又何樂久爲此小人哉去志已決萬不可回一切細情嫌於忿激不必言之於上

惟求去甚堅且不逾十一月初旬此情乞隨時代陳  
如日後得犯卽親送平越并專人送臬憲回省給咨  
亦去不給咨亦去弟因鎮遠考試須移居避之已艤  
舟東行李矣時事日艱才薄不能作事非有所貪冀  
也諒之黎平之行何日可去能振興之殺戮之邊防  
可治缺分之苦事務之繁非平越大定可比然保團  
成法尙未散漫內地盜匪清除殆盡此弟二年心血  
可以共信幸加意補救以救此方

啟呂方伯孔廉訪

今日聞初九日已捕得王桂發等交八寨喚押此是

初五日與官兵對敵之重犯也差爲一慰已備公文  
信函懇吳丞徑解行轅收審計時卑府病愈亦當押  
犯到平越矣承示楚報爲之痛恨勞尤泰本是鼓險  
刁詐毫無良心之徒石卿先生初到湖北彼以鹽利  
干之其時城邑殘破遂偶用之昔年停舟湖北一日  
久已訪知其人屢欲函告而嫌於非分遂亦中止今  
竟誤大局悔恨何已黔中之事本應盡力以答憲台  
知己之恩且臨有事之秋而掉頭不顧異日更何望  
其爲國盡力惟是此中難處不能不逐一陳明實非  
可爲而不爲也尙乞格外原諒兵事非可空談而成

趙括僅能讀書馬謖言過其實是兵家所忌也

申府

三十年來本未究心於此近年身處危難剽竊前人陳籍百不及一所謂道聽塗說是尙趙括馬謖之不若矣六七年來偶有所事亦皆僥倖國家大事莫難於此莫危於此自問本無真實本領不敢自欺以欺上一也連年疲勞精力不支國家多難萬不敢存偃息在牀之心然軍旅之際非以身先之勞之事必無補古今名將不僅才畧異眾亦且精力過人賤體素孱羸近更多病必致有負委託上傷國體兼傷知人之明此固所不敢自欺者二也在黎平防堵

緝捕其始尙有私囊故膽壯氣盛無事不嚴行督責期於必成私囊甫竭而憲帑兩次頒八千金矣交紳士專管以示官之不私一文幸有胡子和等倡議捐輸接濟收繳已逾二萬今年所收在外此事可一不可再日後尙能得如許貲財乎不能也去冬至今防堵勦捕經費又逾二萬五千除發給各廳各屬并委員張韓經手一萬七千四百餘兩另有冊報外

卑府

隨營支放銀八千三百餘兩所費固屬不貲國計支

絀萬分

卑府

用如泥沙尺功未建寸心難安且畀貲

與人爲數已多竇獲盜犯者亦不多見予之則經費

之糜如此吝之則事勢渙散呼應更覺不靈彼辦盜  
尙如此之難况當大股且又安得此鉅萬經費乎蓋  
不能矣刻下之練不足以成軍旅勢須添募黎平鎮  
遠銅仁松桃思州每處或五六日程或十餘日程不  
能遍及卽不能兼顧且所到之處財用何出三也近  
人貪利冒功今日之求乞差使爭先恐後卽異日首  
先潰敗之人屈指計之用人不易至武弁不歸管轄  
尤難以知府徑行軍法賞罰不立威望太卑卽如獲  
安烏合之眾初五日三戰十四日一戰不爲不嚴所  
以解散之故則以憲台按臨開然頓散此卑府不能



立威不能辦事之實證至平越小弁兵不滿百索夫  
百六十名彼竟不知地方武弁本有處分方且謀利  
詐擾之不暇加以嚴詰面無懼容他如此類之文武  
員弁及其更甚於此者何可勝道舉目蒼茫動手窒  
礙必致一事無成束手而待其潰敗四也此時講明  
武備參効劣弁已屬臨渴掘井卽如省弁之伊之霍  
其貪鄙庸惡尙堪一日畱乎霍之出兵其劣跡何如  
伊之中衡其劣跡又何如本省中尙敢如此此外各  
屬更僕難數卽使認真辦理未必能戰而況剝兵蝕  
餉其何以堪五也自來帶兵之員未有不專殺立威

者如魏絳戮僕穰苴斬莊賈孫武致法於美人彭越  
之誅後至者一人皆是也今日之營弁斥之且不可  
何論於斬蹈常習故本非軍旅所宜才薄人微尤以  
顛越爲懼六也總之自問全無本領不敢罔上而謬  
以爲能揣度時勢及人心吏治武備 國計殆不可  
爲與其事敗而負恩不如據實陳明稟求遴委賢能  
事關重大確然自知其不稱至給咨不給咨出自憲  
裁非所敢期也

致周觀察

頃得手諭拳拳告語不啻再三三人非木石能不感泣

惟姪自到黔以來渥蒙賞鑑何忍不竭力以酬知己  
無如病症日增下血如注精力頽敗不能支持且自  
到黔以來直率疏狂不通世故不與時諧讒閒之言  
成於市虎如前日錦屏團長帶練追賊於四灣被傷  
硬說錦屏被劫且說錦屏城內徐姓被劫練勇越境  
殺賊硬說練勇行劫公然形之稟牘以致大憲疑慮  
批飭密查而省中流言無日無時不以黎平爲謠啄  
其離奇驚恍之狀一日千態大憲雖不爲其所惑而  
不能謂大憲意欲保全眾口難調大憲其苦之何啻  
此情勢必不欲使安其位使大憲疑我儼我負大憲

使大憲無可如何然後快於心也語云千人所指無  
疾而死此之謂矣大府恩眷豈不知感士爲知己卽  
捐糜亦所不惜雖然色斯舉矣後時者敗惟受知之  
深則此身不得不私爲已有來諭拳拳恩誼良厚惟  
立志已決病狀日增無可如何他年身健尙可報恩  
兩院前乞據情稟陳口述倩人代書不盡依依

致湖南永綬廳但梓村 文恭四則

三廳向多壯士有眞實不怕死之人否林翼欲糾集  
二三千人爲勤 王之師然招募難支給亦難如  
實在有人可募併紳士內有人才可任將者擬回楚

後設法招致卽赴吳楚勦賊但不怕死三字言之易而行之實難非真有膽有良心者不可僅以客氣爲之一敗卽挫矣林翼之志如此未知能如所願否敬乞囑世兄代爲物色密示爲幸

林翼視壯勇如一身一命與同甘苦疾病死亡撫卹最重惟不用油滑人怯弱畏縮人每月工食四千爲準其頭目則五千六千其擡礮旂幟林翼業已預備並請選擇紳士之曉兵事有膽識有志氣不顧身家不愛錢財者二三人爲管領林翼到辰谿泊舟考驗卽不取者往返盤費林翼必當給之考驗之法取石

掇二百五十觔者弓開八力者鎗礮十發七八中者  
刀矛有身法手法者能泅水者能飛縱上房屋者能  
日行百八十里者能精製軍器火葯攻具者能使風  
使舵者最要莫如樸實耐勞苦膽量可信耳如得義  
勇二三百人能倚以平湖北之賊則報荅 君師  
此心乃覺不愧前蒙世兄助錢五百千師弟如一家  
之親需用之際不敢作一毫虛文亦不敢言謝所求  
練勇必乞十分可靠有志上進之材乃有實濟若如  
近日之兵練雖多無益矣至於紳官中非十分知兵  
十分政戰之士不可攜帶也

勸郡紳緝罕土匪諭

道光己酉鎮遠任內

照得稂莠不鋤嘉禾不生兇暴不緝良善不安此古  
今來保國保家之大要也本府到任已逾八月地方  
匪徒緝獲極多惟沿河司附近一帶著名巨匪迭次  
派差往緝總未應手皆因差役得賄縱放與匪同一  
氣也實堪痛恨查該匪等平日積惡窮兇訛詐賭博  
滋擾鄉民種種罪惡極應懲辦並聞該匪設立皮家  
會名燒香拜把遇有訛詐滋擾之事一呼而至百十  
成羣設遇穀米稍貴之年隨事生風執械坐索大有  
搶奪剽劫之勢是亂萌已伏匪黨將成若不及早剪

除則鄉里街市粗足衣食之人必致被其擾害身家  
不保細思緝匪之法用兵用差不如用士用民以兵  
悍而情差滑而貪而民則樸實可用也若我同黨士  
子讀書明理深知地方之大害必爲苞桑之遠謀斷  
不忍漠然坐視徒作自了之計也且目今該匪等僅  
止訛詐居民鋪戶若因循姑息則肆行無忌必駸駸  
擾及爾等紳衿矣爲此札委該處舉人生員知悉照  
另單所開姓名密約該處曉事族長鄉民設計誘擒  
隨擒隨送派委妥實鄉民持該舉人等稟帖送至府  
署每名賞錢十千文并大銀牌一面以酬其勞決不



失言亦決不輕縱致貽報復之患惟是匪徒行蹤詭秘耳目亦多務須不動聲色遇唱戲酬神及吉凶聚會之時或該匪聚眾賭博之地必可會在一處妥爲誘擒或以智取或以力制或用匪黨爲誘致之謀或用鄉民爲圍擒之計聽爾等妥速籌議無使一名漏網是爲至要本府訪得該舉人等平日精明正派必有一番幹濟之才隨時隨事相機妥辦毋負本府一片苦心且實於爾地方有益但事貴慎密尤貴妥速勉力無違倘該處鄉民族長不能上緊捆送本府立即拘提治以通同包庇之罪凜之特諭

鎮遠團練章程諭 己酉

照得近來盜賊繁多肆行剽劫善良受害閭閻不安  
實本府一人之過深以爲恨本府立志除暴必當殺  
賊保民惟是賊蹤靡定兵役巡緝難周與其拘成法  
而緩不濟急不如藉民力而先事預防茲特酌定團  
練簡便章程官不惜費事不擾民逐條開列於左一  
內盜宜清也鄉村堡寨周圍二三十里作爲一團一  
團之中公舉正派紳耆二人作爲團總公舉強幹曉  
事八人作爲頭人 苗寨中苗民亦照此例辦理 董司捕務其團總  
頭人及各戶姓名均註明印簿如一團中有窩戶引

繞及交結匪類平日爲盜之人該團長頭人卽先捆送到官送官之後審係真正盜犯必當盡法懲治有死無生以免報復爾等之患如或誣攀爾等送盜之人一概不究卽使爾等從前脅從爲盜只要此時能將盜匪捆送本府亦不追究以免攀累爾等之苦經此次曉諭之後如爾等再爲包庇隱容事發卽以窩盜論一外盜宜捕也凡盜匪入境本團放信礮一聲各戶齊執器械禦盜並先派定人戶於要隘處所用火器亂石拋打仍四面協同追趕其左右前後各四團鄰寨聞信後接放信礮均各執器械撲救並派定

入戶於要隘處所用火器亂石拋打仍四面協同追  
趕如保護得宜盡心竭力官長於得信後馳往看驗  
每團犒牛一隻酒五十觔如有坐視不救或無故驚  
擾必當嚴辦一賞罰宜明也團練之寨每寨每季官  
爲捐牛一隻酒五十觔由官親自巡閱給發以作犒  
賞能生擒強盜一名者官賞銀二十兩格殺一名者  
官賞銀一十兩當官給發決不食言決不遲延其勇  
往殺賊致被賊匪傷者當眾驗明傷痕輕重官爲賞  
銀醫治醫治不效者官賞銀五十兩以卹其家至強  
盜入寨一家有事而團中不肯盡力相助或失事後

並不追趕者一經報案照印簿所載戶口按戶提究  
並將本團罰牛一隻鄰四團罰酒八十觔以示懲警  
守望宜嚴也凡各屬交界要隘處所每日每夜令  
每寨輪派二人放哨俱要力壯善走之人由頭人認  
識保充見有大夥賊匪入境卽速分途報知各寨本  
團放信礮一聲左右前後各寨團均依次放信礮各  
戶均持火銃器械齊集追捕放哨之人一面進城報  
官分別程途遠近遲速重加犒賞倘賊匪竄入放哨  
之人違誤失事該寨頭卽查明賊由何路入境將放  
哨人嚴行懲辦本府仍不時派人密查倘查無放哨

之人卽將團總寨頭提比懲處一私派宜禁也團練之所以不能實力奉行者以民間本極貧苦旣恐費用之難給又恐官吏之滋擾今本府之印簿印旂及牛酒犒賞一切用費均由地方官捐辦並飭地方官親赴該處團所當眾發給不致民間捐派一文亦不致在城守候倘書差土弁鄉約頭人有私派一文者準卽稟官提究一私仇宜禁也團練原爲大夥強盜而設倘有假公濟私藉此報復藉此訛詐藉此擾害搶擄者比照強盜例治罪至尋常鼠穿狗盜之犯只許稟官緝拏不准擅殺致干法網一路徑宜清也破

廟巖尙容易藏奸賊匪入寨多以黑夜必先於此駐  
足爾團總寨頭先於各寨中封閉銷燬其山僻小路  
易於通賊任爾等公同築牆挖濠堵塞其河岸渡船  
亦著爾團中公撥妥實渡夫承值倘有賊匪由該處  
渡口偷渡查出卽將渡夫照窩盜例治罪一防範宜  
周也凡寨眾壓送強盜到官沿途經過之寨均派人  
護送以期妥協其盤費官爲賞給不致空勞往返至  
每團丁壯先期核算人戶多寡議定股分遇盜匪入  
寨以兩股禦賊一股守望不可全數出寨恐致疏虞  
以上各條簡便易行今本府不惜數千金之貲財力

爲此舉者祇因盜賊之擾害爲可恨耳爾鄉村堡寨  
紳衿民苗中公正善良者忍不急爲辦理保爾身家  
全爾妻子以體本府一片苦心乎以民衛民有備無  
患實有厚望焉

嚴禁訟費示

辛亥

照得黎平地方地瘠民貧苗民尤爲苦累本府下車  
之始訪聞昔年每因眾寨興訟致有拖山名目費至  
數萬數千數百金不等腥穢之至慘無天日夫民生  
之膏血幾何何堪如此朘削其弊皆由客店影射衙  
門陋規藉端開銷以致民苗受其愚弄不保身家合



行嚴禁爲此示仰客店軍民苗寨人等知悉嗣後訟  
案到官隨到隨審一切鋪堂送案取結之費概行禁  
止宅門以內門印家丁不取一文惟書差之紙筆飯  
食姑念該書役貧苦準爾等酌量給與紙筆飯食錢  
文不得格外多索違者許爾等稟究至客店飯賬每  
因小案拖延開銷至百金數百金以外殊屬荒謬絕  
倫極堪痛恨嗣後爾等有案到城之民務須開筭現  
錢不準各店浮冒開銷盤剝取利如從前積習準爾  
等民苗喊稟本府定將客店提究從重追贓辦罪庶  
幾訟累可清民困可蘇爾民苗亦不得因小故興訟

自取咎戾各宜凜遵

諭黎郡佈種春花

辛亥

照得黎郡四鄉田土每歲於播種粳糯以外於春花一事絕無見聞推原其故非地利之不宜實農人之好懶且爲其田主者多因春花不得子分亦各置之不問本府志在敏養見此膏腴任其荒蕪深爲可惜本年雨水稍缺秋收歉薄來年青黃不接之際米價必昂尤當未雨綢繆惟此地春花種子甚少事在創始諒非易易今本府爲爾農民立定章程所有種子均令田主購買發給或種大麥小麥或種胡豆豌豆

各隨地之所宜不拘一定俟成熟後田主準分十分之三不得多取除傳各鄉紳耆面諭督辦外會行勸諭爲此示仰闔郡民苗人等知悉爾等田主務於本年閏八月初一日購買種子佃戶於九月初一日以後各赴田主家承領種子一律播種熟時收分不特佃戶之口食無虞缺乏抑且來歲之糧價藉可平減從此種子有餘接年而種家有蓋藏人無饑饉是本府所厚望矣本府於秋冬查閱卡棚考驗練丁點查戶口之便卽親赴鄉間履勘田畝如田主不能董率佃戶給發種子將田主責罰佃戶領種而耕作不力

並將佃戶責比其遵奉教令上緊辦理者本府查看之時定行頒賞爲功爲過聽爾士民之自取各宜凜遵

嚴立規條諭

辛亥

照得興利除害所以安民黎郡盜風之熾民生之情業經本府督辦團練勸種豆麥此外尙有未除之害未興之利及前議所未盡者合再定立條規開列於左一揀錢賭博致盜之由責成牌長團長不時巡查有犯者稟官究辦一客籍新來此輩非勾結爲匪卽重利盤剝最爲地方之蠹嗣後一律禁止不準招徠

違者公同稟官驅逐出境一種植雜糧無論種麥種  
蕎種豆種菜聽民之便不拘一定惟來春務要一律  
青蔥野無曠土責成田主佃戶互相勉力倘田主不  
給籽種致田土荒廢者定行責罰田主已給籽種而  
佃戶怠惰未種致田土荒廢者定行責懲其城汛營  
馬自有馬做馬棚如兵丁縱放踐食及民戶牲畜踐  
食一體送官究辦一重利盤剝銀錢利過三分及放  
穀一挑勒還二挑因青黃不接俗名斷頭穀以致窮  
民終歲力作難供欲整除訪拏重辦外準受害之人  
隨時控告官爲嚴治其罪其田主不惜佃戶放借斷

頭穀加倍勒還者譬如剗肉醫瘡害必及身尤當嚴懲不貸一黎郡山場惟杉木油木栗木橡木最關生計貧富皆可取資各處俱要蓄禁不得盜伐加意補種不準再有童山違抗者稟究一鄉間銀錢甚少多以米穀交易須作市價不得勒捐抵算違抗者告官提究一各寨新設卡房如查無巡守之人定行責懲一鄉正團長專司盜賊之事不準干預詞訟一現在各戶所出練丁專爲本團捕拏盜賊各保身家並非抽丁征調毋庸疑慮倘有謠言阻撓致惑眾心者定卽提究以上九條務各實力遵行有則戒之無則加

勉慎勿以身試法致干究處凜之特諭

申諭保甲團練章程

謹手

照得黎郡所屬廳縣界連楚粵地雜民苗盜賊橫行劫掠無忌爾士民苦之久矣本府上年七月下車之始殫竭血誠爲爾士民除害親帶委員紳士下鄉飭行保甲團練賴爾士民力各鄉董勸行之期年所獲逾三百人盜賊衰息居民頗安堵無恐然立法不密則弊生興利不盡則害伏查各村寨閒有不能實力共保團而不練之處爲此再三申諭復立條款委員紳士復爲編審董勸期爾士民曲體本府心各爲身

家性命計同心實力依條款遵行以幾長治久安則  
地方幸甚本府幸甚一卡所以盤查匪徒宜晝夜防  
守也去歲各村寨設立卡房由鄉正團長輪選丁壯  
晝夜防守或十人八人五人不等均出具甘結在案  
今本府查各村寨間有玩而不守者有守而人數與  
結內不符者亦有徒手不帶鳥鎗刀桿者至夜閒無  
人防守各處皆然不知自誤誤人殊堪痛恨嗣後除  
守礮守堡另示章程外爲此責成鄉正團長必每日  
清查守卡人數夜閒卽以輪流支更必各帶鳥鎗刀  
桿如有玩不守卡者查明每人罰錢五百人數不符



者照此議罰徒手者每人罰錢三百夜間不防守者  
每人罰錢五百所罰之錢交鄉正團長收具備用不  
受罰者準指名稟究特須公同查明不準妄指致干  
勒索之罪鄉正團長失察守卡及縱容包庇者經官  
查出加倍罰錢一各村寨經費宜籌也食足用足乃  
可言守去歲行保甲團練鄉正團長按戶量力派捐  
存於各鄉各寨以備公用今本府查各村寨中除已  
有預備外尙多不籌經費者大款輒以人心不一小  
款輒以戶口不繁爲辭不知平日經費不籌一遇警  
變食用無出人心渙散受害不小且按戶分派所費

無多存濟急需所關甚大每慨鄉愚無知一味慳吝  
試問盜來劫殺貲財何有性命何有悔之奚及細查  
保甲團練清冊大款戶口或數百數千不等小款亦  
有三五戶或百餘戶大款派捐固自易易卽以小款  
論百餘戶中有田地及經商者亦必得二三十戶卽  
此便可按戶量捐况款小則出練少而易給嗣後責  
成鄉正團長除窮民免議外均按戶量力派捐或穀  
或錢交本案股實鄉正團長公管存具備用違抗者  
稟官究治侵蝕者加倍議罰一稽查編冊宜嚴明詳  
備也去歲各村寨清查戶口已給印簿填明一存府

署一存鄉正矣今本府查各村寨尙多漏戶或以早  
日犯竊及習慣爲盜不安本分之人鄉正團長多不  
能與之同款或以族戚之故容隱不忍逐出不知編  
聯保甲正爲此輩而設若使成爲漏戶彼反恃無稽  
查現因保甲團練嚴緊伏而不動然舉報不盡將來  
必至肆行無忌尤不可不嚴以預防此次發印簿責  
成鄉正團長逐一再查不準遺漏一戶此輩於取具  
甘結後一體註明冊內寫自新二字或寫察看二字  
或寫游惰二字如一二年真能無犯則去之他若添  
新幼丁及病故者亦須註明幫去者註明某日幫去

幫至何方幫入者註明某日幫來幫自何地作何生  
業亦必詳註又查大戶餘丁多遺漏不載此次須一  
一清查悉開列冊內平日鄉閒集眾賭博及展轉招  
募外人種地盤踞山中亦宜查禁似此則稽查密戶  
口清匪徒無自容矣一守禦諸法平日宜預定也有  
團不練與無團等操演之法鳥鎗在前刀桿在後鳥  
鎗不精則臨時手顫發必不中一發不中勢必棄鎗  
而走刀桿手亦因之而驚故必精鳥鎗以護刀桿刀  
桿不精不但不能近賊鳥鎗手無可恃之人在後其  
效雖精其心尤怯賊匪突來亦必棄鳥鎗而走故必

精刀桿以護烏鎗此在明白大義之鄉正團長平日  
於款內擇一隙地大款選四五十人小款選二三十  
人或於三八日清晨演習給以飯食並與眾講明賊  
來我們地方道路我熟彼生賊眾裏脅我們非親卽  
友大家齊心守護大家齊心救援大家齊心擒捉他  
如何能對我只是我們一走賊便乘勢慘殺矣如此  
演習如此講明人人奮勇人人諳練足以自保亦是  
以其保又平日必擇一二謹實精明之人爲巡丁臨  
事用爲探報一值有變必要聽清楚方不誤事鄉正  
團長等分隊統率總須靜鎮嚴肅烏鎗等器不準輕

發自守往援須據險設伏以計謀相取爲上如賊離寨不遠往援必分練自守往援之練須帶大旗一面上書某鄉練勇以便與賊眾分別一調遣須用傳籤遞信也本府前經製造傳籤分給各處鄉正團長收存一遇盜警卽從該處發籤籤上註明盜自何方來互相傳遞以便各處堵禦就近各團聞信後卽率練飛赴聽候派遣遲誤者稟官究治旣獲盜賊送官亦用傳籤遞解籤上註明盜賊姓名數目獲盜何人起解何時護送若干人經過各寨地名亦必開明以便照籤接解接解之處亦須註明時刻護送若干人遲

誤者稟官究治然獲盜處之鄉正團長總須得一二  
人沿途長解庶不誤事以上五條簡便易行於上年  
七月初次頒示條款外更進一層功夫除盜安良法  
云備矣爾士民其實力實心遵行毋怠本府自到任  
以來無日不與士民相接見其有關係保甲團練之  
事者無不立時傳入書房詳悉訪問切實講究卽白  
丁苗頭亦得侍立左右口講指畫所請無不立刻施  
行送盜來城者卽時審問卽時頒賞凡鄉間爲難之  
處無一不爲爾等作主設法究辦爾士民業已共見  
共聞矣若不卽此時大家齊心斬盡盜根更待何時

爾士民務當各矢天良永守條例切實奉行以保身家以圖久遠毋負本府再三申勸之苦心也勉之凜之特諭

移府廳州縣偵探會辦文

癸丑

竊照做照得本

府奉大憲奏委兼率內匪查內匪以黃平之

高禾

即高禾

九松當垢台拱之老薄也黨烏沙之丟坐

即條

丹江之架生也生爲最而高禾等一股尤爲兇

狡急應嚴辦以淨禍根

本

府迭次詳訊現獲盜犯供

稱該犯等上年夏秋間猶在栗樹坳插秧收穀及迭次在棉花坪望坪排申排養等處會合行劫等情歷



歷如繪查所供地界均係黃平台拱丹江之地緝拏上緊之時到雷公山暫行潛匿總不過三五日卽出是賊匪雖流徙無定要不能離村寨以求食且同夥數十人聚而不散其接濟米糧火藥之窩戶固屬罪不容誅良懦之苗民畏盜燒殺往往被其欺壓容忍不言卽報之士弁通事寨頭亦不轉報官長且恐有不願其報者此賊匪所以出入自由莫可誰何之實在情形也上年臘杪派員帶練久住台盤本年正月十三日敝府行抵凱里十五日申刻放哨之練二十餘人聞長坡寨先日已有賊匪跟至大營對衝山內

遇賊膽敢抵抗拒傷練勇并隨行長夫訪聞是夜賊  
卽竄至丹江之尖山地面後經折回十九日二十日  
在烏霞溝二十一日在台拱雞簍近經台拱黃平清  
平趕緊會合出外巡緝而又不見影響此又高禾一  
股近日出沒無定之實在情形也本府細意思揣賊  
之出沒無常則米糧火藥之接濟宜嚴其要一也賊  
以夜行多行僻路村寨苗民畏其凶悍力不能禦姑  
爲隱忍然力不能禦而見賊卽可速行飛報務須剴  
切曉諭其要二也各地方官責成土司通事寨頭如  
見賊不報卽嚴行提究治其縱庇諱匿之罪如報明

賊蹤屬實只要指引兵練追剿正賊無論有無斬獲  
先賞報信人銀四十兩其要三也各地方各選派差  
十人二十人重給盤費四出訪探一見賊蹤卽飛信  
報知帶勇委員限信到之時拔營山徑險僻林箐幽  
密限日行四十里尙非百里趨利者可比如委員遇  
遇推諉希移許稟知查究但須探實指引卽一例頒賞其  
要四也賊聚一處非剿不可地方官探實指引其剿  
捕之利鈍勝敗均惟敝府任其咎惟查有賊而不報  
經過而若爲不知者則爲地方官之咎萬一賊匪聚  
而偶散則又可由地方官趁勢緝拏所有要犯年貌

住處父兄妻子有無均經迭次開送卽行分別購挈  
其要五也至烏沙羣盜現獲過半仍畱黃千總帶練  
駐守搜緝旣免竄匪之會合又期逸盜之盡淨其前  
次迭次之逸盜名單

卽希貴府廳  
飭該州縣

一體上緊總以盡

淨爲望其要六也高禾等一股行蹤飄忽由台拱可  
下擾清江并擾鎮遠府縣及黎平一帶兼可轉擾都  
勻所屬由丹江可上擾都勻並可擾及古州務須各  
處一體嚴防其要七也爭論地界各分畛域此土司  
胥吏之俗見譬如粵匪到楚總以現在官吏之能防  
剿與不能防剿爲斷耳

貴府廳  
該州縣

當不以土司胥吏之

言爲然且憲德高厚憲意嚴明總以除盜爲本以獲盜之多寡爲衡其論疆域分彼此者恐轉獲咎其要入也合就移知札行爲此合移貴府廳希札仰該州縣務卽趕緊示諭斷接濟勤偵探信實必罰編甲齊團嚴防會剿一面跟定賊蹤一面飛報稟知如日後查出土弁通事寨頭見賊不報經過而佯爲不知或被劫而姑爲隱忍本府惟當一面移提一面稟請大憲將土弁等嚴爲懲辦總之盜匪一日不除地方一日不安卽文武官員又何能回署辦公是所望於同心協力矣

札開泰縣魏令 癸丑

本府現辦苗匪所帶兵練業已分途伺擊風聞粵西  
融縣一帶土匪蜂起與黎平相隔咫尺不可不嚴行  
防範查該處各堡及苗寨情形該縣上年隨同本府  
辦理已知大概所有舊日派委地方紳士姓名該縣  
亦盡相熟雖地系粵防然本府未敢拘泥坐視合行  
札委札到該縣立即持帶本府團練總冊按團按款  
傳集守禦各鄉帶總局銀兩獎勞苗民無使官民兩  
受其害誠不顧是爲至要畱防之練目六品軍功王世  
章智勇雙優可備緩急宜與之妥商七品軍功頂戴  
南江吳紹元八品練目七埋巖梁永昌亦頗謹慎均

可妥爲調遣用兵以得民爲先安民乃能禦侮毋使  
胥吏兵練擾害吾民尤須確探實情切勿張皇急躁  
驚眾心而挫民氣切切

札開秦縣高令

本府現辦內匪隨帶練勇業已分起派去伺便雕剿  
本日據丹江營廳函稱探得初二賊匪已至雷公山  
下番祥腳烏一帶恐卽徑竄清江古州查清江古州  
爲黎平府縣連界之地賊如下竄一二日卽可由深  
山老林之中驀入黎境昨已迭次飛函告知多任并  
函諭各紳士矣多署守來函傳聞融縣匪徒蜂起南

路須防本府業已派委魏令前往堵禦勢必不能兼顧北路西路而現在內地流匪亦須嚴防查北路從開泰苗光起至府屬平畧止上年夏秋間已派姜興國李光茂專司防範清江之事并有各鄉正協同辦事北路兼西之烏柞坳至高微一帶系扼守青山界老林要地凡台拱黃平之盜驀入黎境必由青山界朗洞一帶而來此地山勢最大歧路尤多上年夏秋間因鎮遠一帶頻有盜警特派委員張禮度帶同紳士楊日暄廖文善吳立本新賞軍功吳光榮於各苗寨要隘舊設卡房外新建碉樓并新添埋伏處所計



又不下數十層并有各鄉正協同辦事此次又專札吳立本吳光榮加意董辦該處苗民信樸者居多必有用命但須官爲董勸使之不懈耳現在魏令已派赴南路勢難分身合行札委札到該縣立即由古州便道先於高微一帶會同已派紳士酌帶銀兩獎勞苗民攜帶本府保團舊規舊冊按照上年相廩生日暄所指派設伏處所逐一申警務使苗民知官之意在保愛并非煩擾尤須嚴約隨丁不帶差役與士民同體同心不使其私受苗寨粒米分文則苗民感德畏威出力更倍并須嚴飭各文武委員所帶兵練毋

使授我良苗粒米分文如有不遵舊約貪鄙不肖之人本府一有訪聞無論文武委員立即稟參嚴究本府以防範地方爲急務業已據情稟知大憲札到速卽遵行務須不擾不驚官民一體是爲切要

凱里紳士團練諭

癸丑

爲札委勸諭事本府奏奉諭旨委辦防堵查有革夷高禾九松當垢一股時時出沒於凱里地方急須聯絡榔眾合力剿捕爲此札委該紳士攜帶銀兩前往勸導兩土司地界親到各寨逐一勸諭并將願出力者開冊稟知一面分賞牛酒務須一心一力除此羣

盜以保苗民該紳士之飯食盤費均系本府酌發毋  
許絲毫擾民切切一發去印冊將某寨若干戶十戶  
一牌立一牌長一寨一團立一團長數團之中設爲  
總團立一鄉正印冊一本繳府一本存鄉交鄉正手  
二遇外賊不要明與打仗只先期報信約會各寨夜  
間埋伏用計襲殺或用火攻所燒燬之民房本府出  
銀百兩修補不累民也一遇外賊即時遣人報之官  
長如能指引對敵卽賞銀四十兩如僅止報明不能  
指引對敵賞錢五千一鄉間苗民殺死一賊只要具  
高禾九松蕩垢一股每名賞銀百兩生擒殺死一樣

如得高禾九江每名賞銀五百兩一各寨如有實在  
敢死有武藝之苗民本府招爲練勇另給工食但須  
實實敢死實有本領不得冒充一各寨只保各境不  
派令外出以免征調之煩一各寨明白曉事肯齊心  
者先賞牛酒以示鼓勵以上各條姑言大概爾紳士  
等其速卽曉譬剴切言之務使苗民共知本府愛民  
除害之實心地方永保太平幸甚幸甚

胡文忠公遺集卷五十八終

